

ALAM WANITA

Asmā' binti Yazīd al-Anṣāriyyah

(Rasul Perempuan Arab)

Asmā' binti Yazīd ini, adalah seorang puteri Islam yang sangat mengambil berat di atas nasib yang ditanggung oleh kaum wanita Islam di zamannya. Beliau berpendapat kaum wanita Islam tidak harus keluar menceburkan diri di dalam masyarakat di samping kaum lelaki, selagi masyarakat pendidikan rumah tangga – yang menjadi kewajipan kepada kaum wanita mengurusnya itu – tinggal di dalam keadaan porak-peranda. Ahli-ahli sejarah memberikan gelaran Asmā' dengan nama “Rasul Perempuan Arab”.

(Oleh: Ummu Muhsin)

(II)

“Tuan-tuan para sahabatku sekalian! Pernahkah saudara-saudara sekalian mendengar satu masalah, seperti masalah yang telah dikemukakan oleh perempuan ini, tentang urusan agamanya dan siapakah yang telah menunjukinya?”

Sahabat-sahabat menjawab: “Sekali-kali tidak kami sangka ya Rasulullah! Bahawa kaum wanita mempunyai pendapat yang seluas ini?”

Kemudian Rasulullah berpaling pula menghadapkan mukanya kepada Asmā'. Kerana Asmā' berpakaian secara Islam yang lengkap, bertutup muka dan bertudung kepala dengan rapat dan Asmā' tidak pula memperkenalkan namanya kepada Rasulullah, maka sudah tentu Rasulullah tidak kenal kepadanya. Oleh sebab itu Rasulullah menjawab kemesykilan kaum wanita Arab yang dikemukakan oleh Asmā', tanpa menyebut namanya. Sabda Rasulullah: “Wahai perempuan! Sampaikanlah kepada sekalian kaum wanita

yang menjadi pengikut-pengikutmu akan jawapanku ini bahawa setiap perempuan yang betul-betul taat setia akan perintah-perintah suaminya serta betul ikhlas menjaga suaminya dan sentiasa berkelakuan baik yang menjadikan suaminya selalu bersetuju dan reda akan perbuatan-perbuatannya, seja sekata di dalam satu-satu perkara yang dilakukan oleh suami-suami mereka di dalam amal kebaikan dan bukti – sekalipun dengan sebab mereka menanggung beberapa kepayaan dan penderitaan, maka perempuan-perempuan yang bersifat demikian akan mendapat bahagian pahala yang sama dari apa amalan yang dikerjakan oleh suaminya untuk jalan Allah.”

Setelah Asmā' berpuas hati mendapat jawapan dari Rasulullah itu, maka ia pun minta izin pulang dan terus keluar mendapatkan wanita-wanita Arab yang sedang menunggu-nunggu akan kepulangannya itu untuk menyampaikan jawapan daripada Rasulullah (S.A.W) masalah yang mereka musykilkan itu.

Sehabis sahaja Asmā' menyampaikan jawapan Rasulullah (S.A.W) itu maka kelihatanlah air muka masing-masing senyum berseri-seri yang menunjukkan bahawa mereka tersangat gembira di atas jawapan yang telah diberikan oleh Rasulullah (S.A.W) itu. Sekarang mengertilah mereka setakat mana penghargaan yang telah diberikan oleh Islam di atas segala pengorbanan yang mereka berikan terhadap suami-suami mereka di dalam masyarakat rumah tangga mereka sendiri. Sekalipun pada zahirnya kehidupan mereka terkurung dan terkawal, tetapi pada hakikatnya mereka adalah turut sama keluar ke medan perjuangan hidup menuju ke jalan Allah di samping suami-suami mereka.

Selain dari itu mereka sangat merasa bangga kerana soalan yang mereka majukan kepada Rasulullah itu adalah suatu soalan yang tinggi dan luas ertiannya dari segi masyarakat hidup kaum wanita yang selama ini mereka anggap tertindas dan terkongkong oleh tekanan dari undang-undang Islam

itu. Kerana sebelum Rasulullah (S.A.W) memberikan jawapannya baginda kelihatan sangat tertarik dengan soalan yang dikemukakan oleh Asmā' itu, sehingga baginda memajukan pertanyaan kepada sahabat-sahabatnya yang hadir di dalam majlis itu dengan sabdanya:

"Pernahkah saudara-saudara sekalian mendengar satu masalah seperti masalah yang telah dikemukakan oleh perempuan ini tentang urusan agamanya dan siapakah yang telah menunjukinya?"

Di sini kita seluruh kaum wanita harus mengambil perhatian bahawa wanita-wanita Arab yang dikatakan hidup terkongkong di bawah tekanan undang-undang syariah Islam itu, bukanlah bererti Islam mengongkong keseluruhan hati dan jiwa mereka untuk berfikir. Hati dan fikiran mereka diberi kebebasan dengan seluas-luasnya untuk memikirkan sesuatu pekerjaan yang baik. Mereka dibenarkan untuk melaungkan suara dengan sekeras-kerasnya bagi mengeluarkan sesuatu pendapat yang bersesuaian dengan ajaran-ajaran Islam. Ajaran-ajaran suci yang dibawa oleh Islam lebih banyak menitikberatkan soal menjaga moral dan akhlak di dalam pergaulan. Kerana Islam memandang apabila sesuatu umat itu jatuh moral akhlaknya, maka akan jatuhlah nama seluruh bangsa yang muncul dari keturunan umat itu.

Agama hendaklah dijunjung dengan setinggi-tingginya, akhlak mestilah dijaga dengan sepenuh-penuhnya, kebebasan bergaul hendaklah mempunyai batasan dan sempadan, supaya jangan sampai terkeluar daripada perbatasan adat resam kewanitaan Islam, jangan sampai

melampaui daripada had yang direndah Allah, tegasnya jangan sampai melanggar perintah agama.

Wanita-wanita Islam di zaman lampau juga sama merasakan bahawa diri mereka selalu ditindas oleh pihak lelaki, sehingga mereka menyangka dan menganggap bahawa tindasan-tindasan itu berlaku dengan sebab adanya tekanan yang tidak adil dari hukum-hukum Islam yang telah memberikan kebebasan yang lebih kepada kaum lelaki, kerana mereka memandang beberapa perkara yang dibolehkan kepada kaum lelaki, tidak dibolehkan kepada kaum perempuan. Jadi dengan perasaan yang tidak seimbang ini timbulah fikiran mereka hendak menuntut hak keadilan yang sama dengan kaum lelaki, sedang Islam membatasi hak-hak mereka itu adalah memandang kepada beberapa kelemahan sifat dan tenaga yang ada pada kaum wanita, yang mana maslahat dari sekatan-sekatan yang telah dibatasi oleh Islam itu adalah kembali kepada diri mereka sendiri, hal ini tidak disedari oleh kebanyakan daripada kaum wanita Islam di zaman ini.

Syukur *al-ḥamdu l-Lāh* pada masa kaum wanita Arab mengemukakan soalan tersebut, Rasulullah (S.A.W) masih hidup. Dengan keterangan-keterangan yang telah diberikan oleh baginda kepada mereka itu dapatlah mereka mengetahui bahawa darjah hidup kaum wanita adalah sama tinggi dan sama setaraf dengan kedudukan kaum lelaki di dalam jurusan mendapat ganjaran dan pahala yang diberikan oleh Tuhan yang Maha Kuasa. Ganjaran pahala yang dikurniakan Tuhan kepada suami-suami yang berjuang di medan ilmu pengetahuan, di medan mencari nafkah hidup yang halal, di medan

pertempuran kerana menegakkan agama Allah, akan dikurniakan pula kepada isteri-isteri mereka yang taat setia menjunjung perintah mereka, kepada isteri-isteri yang berkhidmat di dalam rumah tangga untuk menjaga suami dan mendidik anak-anak dengan hati yang bersih dan ikhlas disertakan dengan amal ibadat yang tiada berkeputusan.

Adapun isteri-isteri yang tidak ikhlas, yang suka membangkit-bangkit dan menyumpah menyerah di atas segala kepentingan kerja yang bersabit dengan urusan rumah tangga dan tidak pula mengerjakan amal ibadat, maka sudah tentu mereka tidak akan mendapat ganjaran pahala seperti mana yang telah dijanjikan oleh Rasulullah (S.A.W) kepada Asmā' itu.

Sekadar ini sahajalah yang dapat saya ceritakan dari hal kisah Asmā' binti Yazīd al-Anṣāriyyah yang digelar "Rasul Perempuan Arab" oleh ahli-ahli sejarah Islam. Semoga kisah ini akan menjadi contoh dan tauladan bagi kita seumur kaum wanita Islam yang berada di zaman

Kata-kata Hikmah

Jikalau nasihat seorang gila itu bagus, sudah tentu orang yang berfikiran waras akan menggunakannya.
– HAMKA.

* * *

Jangan melihat sesuatu pekerjaan yang telah kamu usahakan, tetapi lihatlah sesuatu pekerjaan yang belum kamu selesaikan. – Ruskin.